

BOSNA I HERCEGOVINA
FEDERACIJA BOSNE I HERCEGOVINE
VRHOVNI SUD
FEDERACIJE BOSNE I HERCEGOVINE
Broj: 18 0 Rs 054484 23 Spp
Sarajevo, 26.04.2023. godine

Vrhovni sud Federacije Bosne i Hercegovine u Sarajevu, odlučujući o zahtjevu Općinskog suda u Bosanskoj Krupi za rješavanje spornog pravnog pitanja od 24.03.2023. godine, na osnovu odredbe člana 61. Zakona o parničnom postupku F BiH¹, te odredbe člana 18. Pravilnika o unutrašnjem sudskom poslovanju Federacije Bosne i Hercegovine i Brčko Distrikta², na sjednici Građanskog odjeljenja održanoj dana 26.04.2023 godine donio je

ODLUKU

Odbacuje se zahtjev Općinskog suda u Bosanskoj Krupi za rješavanje spornog pravnog pitanja u predmetu tog suda broj: 18 0 Rs 054484 22 Rs, koje glasi:

„Da li odluka donesena u postupku povodom javnog oglasa Javnog preduzeća može biti predmet preispitivanja pred općinskim sudom?“

O b r a z l o ž e n j e

Dopisom od 20.03.2023. godine, koji je zaprimljen u ovom sudu dana 24.03.2023. godine, Općinski sud u Bosanskoj Krupi dostavio je ovom sudu, po prijedlogu tuženog, zahtjev za rješavanje spornog pravnog pitanja u predmetu broj 18 0 Rs 054484 22 Rs koje glasi:

„Da li odluka donesena u postupku povodom javnog oglasa Javnog preduzeća može biti predmet preispitivanja pred općinskim sudom?“

U skladu sa odredbom člana 61.b stav 1. ZPP Općinski sud u Bosanskoj Krupi je u obrazloženju zahtjeva naveo kratak prikaz utvrđenog činjeničnog stanja u konkretnom predmetu, iz kojeg proizilazi slijedeće:

Tužiteljica je dana 27.10.2022. godine podnijela tužbu protiv tuženog JP „Radio Bosanska Krupa“ d.o.o. Bosanska Krupa, radi poništenja Odluke tuženog broj 92/22 od 21.06.2022. godine te nalaganja tuženom da do kraja provede proceduru prijema u radni odnos na temelju javnog oglasa za prijem radnika u radni odnos na neodređeno vrijeme za radno mjesto novinar. Navedenom Odlukom tuženi je poništio svoju Odluku o potrebi za zasnivanje radnog odnosa broj 28/2022 od 14.02.2022. godine i slijedom toga poništio javni oglas za prijem radnika u radni odnos na neodređeno vrijeme za radno mjesto novinar.

U odgovoru na tužbu tuženi je stavio prijedlog da sud zahtjevom pokrene postupak pred Vrhovnim sudom F BiH radi rješavanja spornog pravnog pitanja. Tuženi smatra da njegova Odluka broj 92/22 od 21.06.2022. godine ne može biti predmet preispitivanja u postupku pred redovnim sudom, jer je javni oglas poništen, tako da konkursna komisija više nije imala osnov za provođenje konkursne procedure, što je potvrdio i inspektor rada.

Prvostepeni sud je u zahtjevu za rješavanje spornog pravnog pitanja izložio sopstveno tumačenje spornog pravnog pitanja, izražavajući stav da je općinski sud nadležan da odlučuje

¹ „Službene novine F BiH“ broj 53/03, 73/05, 19/06 i 98/15

² „Službeni glasnik BiH“ broj 66/12 i 40/14

o zakonitosti odluka donesenih u postupku javnog oglasa. Istovremeno, prvostepeni sud je istakao da pred tim sudom ne postoji veći broj predmeta u kojima bi predmetno sporno pravno pitanje bilo od značaja za odlučivanje.

Odredbom člana 61.a stav 1. ZPP propisano je:

„Ako u postupku pred prvostepenim sudom u većem broju predmeta postoji potreba da se zauzme stav o spornom pravnom pitanju koje je od značaja za odlučivanje o predmetu postupka pred prvostepenim sudovima, prvostepeni sud će po službenoj dužnosti ili na prijedlog stranke zahtjevom pokrenuti postupak pred Vrhovnim sudom Federacije radi rješavanja spornog pravnog pitanja“.

Prema citiranoj zakonskoj odredbi, zauzimanje stava o spornom pravnom pitanju, između ostalog, mora biti od značaja za odlučivanje u postupku pred prvostepenim sudom u većem broju predmeta. Radi se o uslovu koji predstavlja procesnu pretpostavku za rješavanje spornog pravnog pitanja, nezavisno od toga da li zahtjev sadrži sve elemente propisane članom 61.b stav 1. ZPP.

Navedena procesna pretpostavka u konkretnom slučaju nije ispunjena, budući da je prvostepeni sud u zahtjevu za rješavanje spornog pravnog pitanja naveo da pred tim sudom ne postoji veći broj predmeta u kojima postoji potreba da se zauzme stav o spornom pravnom pitanju.

Iz sadržaja zahtjeva također, proizilazi da prvostepeni sud postavljeno pravno pitanje ne smatra spornim.

Kako zahtjev prvostepenog suda za rješavanje spornog pravnog pitanja nije podnesen u skladu sa odredbama člana 61.a stav 1. ZPP, Građansko odjeljenje Vrhovnog suda Federacije BiH je na sjednici održanoj dana 26.04.2023. godine, primjenom člana 61.c. stav 1. ZPP, odbacilo zahtjev za rješavanje spornog pravnog pitanja.

Predsjednik Građanskog odjeljenja
Radenko Blagojević